



STINAPA TA INFORMA

JENNY RIJNA

Ta poko kas tin na Boneiru ku por haña asina fásil manera esun di Jenny Rijna. Dilanti di porta, anto den kurá tambe pa hopi aña kaba tin pòpchinan grandi i riparabel ku e mes ta traha i ku e ta adaptá regularmente pa kuadra ku e temporada di aña, manera por ehèmpel Karnaval, Pasku òf Simadan. Jenny, kende tin 72 aña awor, a nase na Boneiru den Nikiboko, pero el a lanta den kurason di Antriol. Aña pasá el a selebrá 45 aña kasá ku su Eddy, huntu ku su 3 yunan i su nietunan. E hòbi ku a dun’é asina hopi fama a lanta kabes na edat avansá kaba. Promé Jenny a traha 26 aña largu na ‘Boolchands’, pero un dado momentu su pianan a kuminsá molesti’é. El a disidí di keda kas un tiki mas. Pokopoko Jenny a kuminsá haña mas atenshon pa kultura di su propio isla, ku su pañanan kolorido di Karnaval i Maskarada. Promé Jenny a kuminsá traha e Pòpchinan Belua di Maskarada. Na kuminsamentu e no a gusta e komentarionan ku e mester a soportá, asta di su mes kasá i yunan. Nan tur a hañ’é loko. Pero awor e ta hañando hopi apresio, especialmente di turistanan. Su kurá tin algu di un historia di Kompa Nanzi, ku tur su pòpchinan i su seis flamingonan. E flamingonan ta un historia apart tambe; turistanan a pone nan den su kurá komo beibi pasobra nan a haña nan bandoná dor di nan mama. Anto tur hende tabata bisa ku mester hiba nan pa Jenny pasobra “e por kuida nan asina bon!”. Awor si e no por tuma mas, e ta bisa, pasobra nan ta kome kos karu: nan kuminda faborito ta “kattenbrokjes” ku smak di piská. Bo’n ta haña? Jenny: “Na Boneiru hendenan ta kla pa bisa ku bo ta loko ora bo ta bai muchu ‘diep’ den kultura òf naturalesa, pero ami no ta wòri pasobra mi ta haña admirashon di e turistanan anto pasobra na un otro isla di Karibe mi a haña un lugá kaminda nan ta hasi mesun kos ku mi. Tambe mi ta kolektá artefaktonan bieu. E ta manera un bashí ku mi ta purba yena. Pasobra ora bo ta hóben bo no ta realisá balor di kustumbenan bieu i bo mes kultura. Pero kultura t’asina importante; Un pais sin kultura no bal nada. Ta importante pa sa di unda bo a bini pa bo midi bo adelanto.” E naturalesa di Boneiru ta úniko segun Jenny, pero bo mester kier wak e si. Voral e aña aki Boneiru ta asina bèrdè i nèchi. Den su mes kurá el a planta yen di tipo di kaktùs p’e turistanan por wak nan fásil. I serka di su kas tin Chachacha Beach, ku segun e mes ta hopi mas mihó ku tur otro bich ku el a yega di wak. Eddy ta bai landa einan tur dia, sin falta niun. E mes no por drenta asina fásil mas, pero hopi biaha e ta kompañi’é si. Jenny lo tabata hopi kontentu si hendenan di Boneiru lo no kap palu asina fásil mas. E sa bon kuantu tempu ta dura pa un palu bira grandi. Pasobra e tin e bunita kustumber di planta un palu ku ta bira grandi pa kada yu i nietu ku nase. E ora ei e sa presis kuantu aña e palu tin. Jenny: “Lo mi deseá ku mas hende ta hasi esei, pasobra nos mester duna nos apoyu na inisiativanan ku t’ei pa duna naturalesa i kultura un man”.

Skirbí pa Marcel Nahr.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALES



Traha huntu na un desaroyo duradero pa Boneiru